

24 SEPTEMBRIE
RUGACIUNEA 2
SF. CUVIOS-MUCENIC
GALACTION DE LA VOLOGDA

Молитва

Преподобне отче наш Галактионе, светильниче страны нашей, подвигоположников удобрение, Вологды града заступниче теплый и неусыпный, за ны грешныя ко Всемилостивому Богу нашему Иисусу Христу и ко Святей Пречистой Матери Его, Владычице нашей Богородице, Приснодеве Марии молитвенниче, молим твою честную святыню мы, недостойнии рабы твои, зря на святочудотворный образ твой духовными взоры, не забуди нас, сирых, но яко отец чадолюбивый посети духом душ наших немощь и испроси молитвами твоими у Христа Бога нашего, да освятит души наши и ум наш просветит, и вразумит, и совести наша от всякия скверны очистит, и от нечистых помышлений, и вредных разумений, и губительнаго уныния, избавит нас от бесовских наветов, и дневных и нощных озлоблений, и дарует нам искреннее покаяние, сердцу сокрушение, слезы и умиление, воздержание и трезвость, смиренномудрие и

кротость, чистоту душевную и телесную, нищелюбие же и страннолюбие, и друг ко другу нелицемерную любовь, и милосердие, и всякое благоволение. О, всеблаженне отче наш Галактионе, сподоби ны последовати по силе пути спасенному, яко да твоими молитвами Преподобный Христос, Бог наш, покажет нам, грешным, благодать и милость Свою, и всяких зол и будущего мучения нас свободит, и сподобит наследником быти Царствия Своего Небеснаго, славящих Его и величающих купно со Безначальным Его Отцем и Пресвятым и Благим и Животворящим Его Духом, ныне и присно и во веки веков. Аминь.